

مکتبہ اسلامیہ

ادبی و سیاسی رسالہ اسبوعیہ در

۳۱ نجی سنہ

۱۱ ذی القعدہ ۱۳۲۹

پنجشنبہ

جزء عدد : ۱۱۹

ایتالیانک ھزیمتلى

۵

حبشستان مغلوبىتى

ایتالیانك ملت واحده اوله رق تشكلى وایتاليا حكومت حاضره سنك نه صورته تأسس ايتديكى تدقيق ايديله جك اولورسه ، يعنى بوملتك ، اون طقوزنجى عصر ك نصف اخيرندن زمانزه قدر اولان وقوعات و صفحات تاريخى سى پيش مطالعه يه آلورسه نظر امعانه جالب عبرت و حيرت ايكي حقيقت چاربار .

اؤل امرده كوريلوركه بوكون ملكمزمك مهم برقطه سنه واقع اولان ناكسانه تجاوزيله موجوديت عثمانيه يي ناكه نانى بيوك برتهلكه قارشيسينده بولنديران ايتاليا بالذات كندى موجوديتنى بزلره ، ملت عثمانيه يه مديوندر . فى الحقيقه ، ايتاليا اتحادينك اك بيوك عاملى و بوكونكى ايتاليانك مؤسس بنيانى اولان (قاوور) ، ملكيتنى بر دولت واحده و مستقله اوله رق ميدانه چيقارمق يولنده كى تشبثاتنده ايلك موفقيتى حكومت عثمانيه يه استناد سايه سينده استحصال ايدى بولمشدى . قاوور ، ساردونيا قرالى شارل - آلبرك ۱۸۴۹ ده (كوستوزا) و (نووار) مغلوبىتلى اوزرينه ترك سلطنت ايتديكى تاريخدن اوج سنه صكره يعنى ۱۸۵۲ ده رأس كاره كالديكى وقت ، ۱۸۱۵ سنه سندينبرى ايتاليا وطنپروراننك ايتاليا اتحادى وجوده كترىمك ايجون واقع اولان تشبثات و مساعيسينده كى خطايى كورمىش ، ايتاليا شبه جزيره سنك اويله صرف كندى قوتيله ، وقت وقت حرركات اختلايه و قىاميه يه تصدى ايله . آوستريا بيوندروغندن قورتيله ميه جفنى و بواصر عظيمك اوروپانك معاونت و مظاهرت ماديه و فعليه سى اولدقجه باشه چيقيه ميه جفنى آكلامشدى . ايشته ، بيوك آدمرك خواص ممتازه سيندن اولان افراط درايت و فطانت ايله مفعطور بولنان بوسياسى ، موقع اقتداره كاليركلز هر شيدن اؤل اوروپانك ايتاليا اوزرينه مؤثر برصورنده جلب نظر دقتى فرصتى قوللامغه باشلامشدى .

۱۸۵۴ سنه سنده قریم محاربه سنک ظهوری ایسه . (قاوور) . منتظر بولندینی وسیله بی تهیه ایلش اولدی . قریم محاربه سنده انکلتزه و فرانسه ، حکومت عثمانیه ایله بالاقفق روسیه قارشى اعلان حرب ایدنجیه ، ساردونیانک بوفر صبحو ودور بین باش وکیلی درحال فرانسه وانکلتزه بلرمراجعه کندولریله برلکده حکومت عثمانیه معاونت تکلیفنده بولندی و بوتکلیفی قبول ایتدیره رک قریه اون بش بیك (پیه مونته) عسکری سوق ایتدی . (قاوور) ک بوماه رانه تشبندن ایکی مقصدی وار ایدی : اول امرده (کوستوزا) و (نوار) محاربه لرنده آوستریا طرفندن مغلوب ایدلمش اولمزلندن طولانی حیثیت واعتبارلری اروپا نظرنده منگسر اولان (پیه مونته) عسکرلرینه ، دول متفقہ قواسنه استناداً استحصال ایدیله جک بر ایکی موفقیتله یکیدن جلب نظر تقدیر و تأمین شان و شرف ایله مک . ایکنجی درجه ده اروپا امورینه بوصورتله مداخله یه وسیله یاب اوله رق اروپا دولتلری آرمسنده بر موقع احراز ایتک ایدی ، که بوده ایتالیا اتحادینی سرسمانه مقصد ایدلمش اولان اوچنجی ناپولیونک سایه حمایه سیله حاصل اولمشدی . (قاوور) بوحساباتنده تماماً موفق چیقدی . چونکه ایتالیا عسکرلری ، قریمه عثمانلی ، انگلیز و فرانسز قواسنک زیر سلطوتنده بر ایکی یارارلق کوستریه یلشدی . (پیه مونته) حکومتی ، بوصورتله اروپانک غلبه ومظفریتنه اشتراک ایلش اولدیفندن ۱۸۵۶ ده پارس ده انعقاد ایدن قونفرمه قبول ودعوت اولندی . حکومت متبوعه سی طرفندن کندینی مرخص تعیین ایتدیرمش اولان (قاوور) ایسه ، قونفرمه اعضاسنک افکارینی ، ایتالیا اتحادی مسئله سیله اشتغاله و آوستریا طرفندن تحت تحکم وتغلبه طوتیلان ایتالیانلر لهنده جذب واماله یه موفق اولدی .

ایشته کوریلورکه (قاوور) ایتالیا اتحادینک بنیاتی قورمق ایچون واقع اولان تشبثات و مساعیسنده ایلك موفقیتینی قریم محاربه و پارس قونفرمه سی وسیله سیله اله ایتمش اولبور و بو اعتبار ایله درکه ایتالیانلر ، بوکونکی موجودیتلرینی ، قوت وسطوت حاضرلرینک ک مؤثر عامل استحصالی اولان اتحادلرینی عثمانیلرله مدیوندرلر .

ایتالیا تاریخ حاضرنده جالب نظر دقت ایکنجی نقطه ایسه . بوقومك، اتحادینی موفقیات حربیه دن زیاده هزیمات حربیه ایله وجوده کتیرمش اولمیسدر . صکره دن تشکیل ایدن ، یکیدن تأسیس موجودیت ایلان دولتلدن هانکیسنگ تاریخی تدقیق ایدیلیرسه کوریلورکه ، یکی بردولت میدان چیقارمق . دأما قوت ایله ، قوتك ایجاباتسندن اولان قهر خصم ایلک ، محاربه لده تأمین غلبات ایتمک ایله میسر اولمشدر . مثلاً بوکونکی حکومتات متحده آمریکا برحکومت مستقله حائی ، آنجق انکلیزلری کرک منفرداً ، کرک فرانسه نك معاونتیه متوالی مغلوبیتلره دوچار ایتمکله احراز ایده یلمشدر . کذا پروسیا حکومتی ده بوکونکی معظم آلمانیا امپراطورلغنی ، یکدیگری متعاقب احداث و اعلان ایلدیکی اوج محاربه ده (یعنی دانیمارکه ، آوستریا ، فرانسیه قارشى اولان محاربه لده) نائل مظفریت و غلبه اولمقله وجوده کتیره بیلدی . ایتالیانك تاریخ تشکّل و تأسیسی مطالعه و تدقیق اولنورسه قضیه نك تمامیه معکوس اولدینی مشاهده اولنور . ایتالیانلرک ، ایتالیایی برحکومت واحده حاله کتیرمک ایچون واقع اولان تشبثلری ۱۸۱۵ سنه سندن اعتباراً باشلار . ۱۸۱۵ سنه سی معاهداتی ، معلوم اولدینی اوزره ، ناپولیونك قدرت جبارانه سنه استناداً اوروباده یاپدینی تقسیمات کیفیه ده خاتمه جکرک ، ایتالیایی حال قدیمه ارجاع ایلش ، یعنی قسماً آوستریانك زیر اداره سنه وضع ایتمش و قسماده کوچك کوچك ، مستقل و متفرق حکومتلرک اله برافشدی . ایشته بوتاریخدن اعتباراً برطرفدن آوستریانك تعدیات و اعتسافاتسندن یزار اولان، دیگر طرفدن ده کوچك حکومتلرک عجز و سوء اداره سندن امید دوشن ایتالیانلر ، شبه جزیره ده کی بتون همجسملرینی مستقل برملت و حکومت حاله کتیرمک ایچون ۱۸۴۸ تاریخه قدر پك چوق دفعه لر موضعی اختلاللر چیقارمشلر ، قیاملرده بولنمشلر ایدی . فقط بو مختلف تشبثاتك نتیجه سی دأما عقیم قالدی . نهایت ۱۸۴۸ سنه سنده ، ساردونیا آطه سیله شبه جزیره نك شمالنده آوستریا ایله هم حدود اولان (پیه مونته) ایالتدن متشکل بولنان (ساردونیا) حکومتك قرالی (شارل - آلبر) وحدت و استقلاللی غایه آمال ایدینان بتون ایتالیان وطنپرورلرینك باشنه کچدی و اتحادك حصوله اك زیاده مانعه تشکیل ایدن

اوستریا به اعلان حرب ایلدی . کوچک (ساردونیا) حکومتک بیوک اوستریا به
 بوسورتله میدان اوقومسی حدندن بیوک برایشه تصدی صورتندم تلقی ایدیله من .
 چونکه اول امرده (ساردونیا) قواسنه ، ایتالیانک هر طرفندن کان کونکلیر
 التحاق ایتدیکی گبی ، جنوبده کی حکومت صغیره نك كافه سی ده عسکر اعزامی صورتله
 معاونتده بولمیشدی . دیگر طرفندن ده اوصرمده اوستریا بیوک بر اختلال داخلی
 ایله مشغول بولندیجی جهتله جداً ضعیف بر حالده بولنبوردی . یعنی (ساردونیا)
 حکومتی اوستریا به اعلان حرب ایتدیکی وقت ایکی دولتک قوتلری یکدیگرینه
 مساوی و حتی اوستریانک مشکلات داخلیه سی و محارستانک حرکات افتراقکارانه سی
 اعتبارله (ساردونیا) نك قوتی فائق بیله ایدی . بوندن ماعدا اوستریانک دیگر
 بر سبب ضعفی ده اردوسنك مشترك بر غایه آمالدن محروم ملل مختلفه دن مرکب
 بولمسی تشکیل ایلنبوردی . حال بوکه (ساردونیا) اردوسی صرف ایتالیانلردن ،
 یعنی عین عرقه منسوب ، عین لسانله متکلم ، سنه لردن بری عین فکر ایچون
 جالیشمش یکو جود و یک امل افراددن متشکل ایدی . ایشه هر درلو اسباب ضعف
 اوستریا اردوسنه توجه ایلدیکی و (ساردونیا) اردوسی ده بالعکس کافه وسائل قوت
 واتحاده مالک بولندیجی حالده ، اساساً مزیات عسکریه و خواص جنسکاورانه دن کلیاً محروم
 بولان ایتالیانلر ایچون ینه تأمین غلبه و موفقیت قابل اوله مدی . بالذات قرال (شارل -
 آلبر) ک تحت اداره سنده اولان ساردونیا اردوسی ، مسلک و طبیئته لایق صورتده بدایه
 چته مصادمه لری گبی بر قاچ اوفاق محاربه ده تأمین موفقیت ایلده بیلیدیسه ده نهایت
 ۲۵ تموز ۱۸۴۸ ده وقوع بولان (گوستوزا) میدان محاربه سیله ۲۵ مارت ۱۸۴۹ ده
 واقع اولان کذا (نووار) میدان محاربه سنده جنرال (راده چکی) قومانداسی آلتنده کی
 اوستریا اردوسی طرفندن قطعی صورتده دوجار مغلوبیت و هزیمت اولدی . (نووار)
 مغلوبیتندن صکره ایسه قرال (شارل - آلبر) سلطنتدن فراغ ایدمدرک برینه
 اوغلی (ویکتور - نه مانوئل) یکمیشدی . ایشه ایتالیا اتحادینی وجوده کتیرمک
 ایچون قیام ایدن ایتالیانلرک ایلك هزیمتلی بولنلردر و او وقتدنبری ایتالیا حکومتی
 نه وقت یالکنز باشنه حرب ایتدیسه - حتی دول معظمه عدادینه داخل اولدیجی

بر صرمدہ آفریقادہ کی حبشلیلوہ قارشی حرکت ایتدیکی وقت بیلہ - ہپ مغلوب اولمشدر . ایتالیانلر ۱۸۴۹دن صکرہ ، بالادہ نقل ایتدیکنمز اوزرہ ، (قاوور) کث تدایر ماهرانسی سایہ سنده قریم محاربہ سنہ اون بش بیک کشیک بر قوتله اشتراک ایتمشلردی . ایتالیاعسکری بو حرب ائسانسندہ دول متفقہ قوتہ استناداً بر قاج یارارلق کو سترہ بیلدی . ۱۸۵۹ سنہ سنده فرانسه ایله مشترکاً آوستریاہ اعلان ایدیلن حربیدہ ایسہ ایتالیانلرک منفرد آھیج بر مظفریت و موفقییتلری اولیوب (ماجنتا) ، (مارینانو) و (سولفرینو) محاربہ مشہورہ لری همان مستقلاً فرانسر اردوسی طرفدن قازانمشدر . آئدن صکرہ ۱۸۶۶ سنہ سنده پروسیانک آوستریاہ قارشی آجیدنی محاربہ کلیرکہ بو محاربہدہ آوستریا بر طرفدن پروسیانک دیگر طرفدن ایتالیانک هجومنہ معروض اولهرق ایکی آتش آرمسندہ قالمشدی . آوستریا بو صورتلہ قوتی ایکی یہ تقسیم ایلک مجبوریتندہ بولندینی و ایتالیا ایسہ ، اوتاریخندہ چوقدن تاسیس اتحاد ایدہرک منتظم براردو چیقارمق اقتدارینی حازر اولدینی حالده بالذات قرال (ویکتور - مانوئل) ایله مشہور جنرال (لامارمورا) نک قوماندلری آلتندہ اولان ایتالیا اردوسی ۲۴ حزیران ۱۸۶۶ تاریخندہ واقع اولان ایکنجی (کوستوزا) محاربہ سنده ، آرشیدوق (آلبرا) کث زیر ادارہ سنده کی آوستریا اردوسی طرفدن بردها هزیمت قہقریہ دوجار ایدلدی . ایتالیانلر . بو مغلوبیتدن صکرہ یکانہ امیدلرینی آوستریاہ قارشی بر موفقییت بحریہ احرازینہ بنا ایتمشلردی . چونکہ ایتالیا قوای بحریہ سی دہا اوتاریخندہ آوستریا قوای بحریہ سنہ فائق بولنبوردی . بوجہتلہ ایتالیانلر آوستریایی بحر آہمہ حال مغلوب ایدہ جکلرینی مأمول ایدیورلوردی . حالبوکہ ۲۰ تموز ۱۸۶۶ تاریخندہ (تگہنوف) سوار اولدینی براخشاب فرقتین ایله اوزمانک الکسیوک زرهلیسی اولان (ایتالیا) اسمندہ کی سفینہ آہنینی برانپہدہ غرق ایدرک (لیسا) مظفریتی احراز ایلدی ایتالیانک . بر جہتدن پک قوی بر خصم ایله اوغر اشمقندہ اولان آوستریاہ قارشی بر آ و بحر مغلوب اولسی حیثیت واعتبار عسکری سی پک زیادہ منکسر ایتدیکی کی بعد المحاربہدہ ، متفق اولان پروسیانک مظفریتہ رغماً بالا پروازانہ مطالباتدہ بولنمسنہ مانع اولمشدی . ایشتہ گوریلورکہ ، ایتالیانہ وقت یالکیز اولهرق حرب ایتدیسہ - قونی

معناً و ماده فائق ده اولسه - ینه احراز غلبه ایلیمامش و هزیمتدن دوشدیکي حالده آنجق متفق لرینک غلباتی سایه سنده موجودیتنی تأسیسه و اتحادینی اتمامه موفق اولمشدر . فقط بوگونکی ایتالیا دولت معظمه سی ایچون اصل باعث شین و عار اولان ، اردوسنک شرف و ناموسنی بایمال ایدن ، عسکرینک مزیت حربیه سی هیچه ایدیرن بروقه وارسه اوده حبشستان سفرنده دوچار اولدینی هزیمت قهقره در . حتی دینله بیلیرکه آفریقا قطعه سنده استیلای اراضی یاریشنه چیقهرق بروقتلر ریر علی الجملة سوقیات عسکریده بولنمش اولان اوروپا دولتلری میانشده هیچ برینک قوای منظمه سی ، حبش سفرنده ایتالیا نلره واقع اولدینی اوزره ، اویله مزاراقلر ، قارغیلرایله مسلح و آياغی چپلاق ، باشی قباق وحشی قافله لرندن مرکب غیر منتظم برقوته اصلا بودرجه خجالت آور بر صورتده مغلوب اولما مشدر . ایتالیا - عثمانلی حربینک ظهورندن بری مطوعاتمز حبش سفرندن مکرراً بحث ایلدیلر ، سفرک بعض صفحاتندن صبق صبق مثاللر کتیردیلر . فقط همان هیچ بر غرضته و یار ساله مزده بو حربینک ، میدانندن منتهاسنه قدر صورت ظهوریله و قایعک طرز جریانی محیط اوله جق صورتده معلومات و تفصیلات اعطا ایدلمدی . حال بوکه حرب حاضر مناسبیله بوسفرک پک عبرت آمیز اولان صفحات و وقوعاتی حتی تفرعاتیله بیلوب اوکرنک بزلر ایچون جداً موجب استفاده در . باخصوص که حبش سفرنده یالکمز ایتالیا اردوسنک ناموس عسکریمی دکل فقط دیپلوماتلرینک نامی دخی لکه دار اولمشدی . بواسبابه مبنی سفر مذکور حقنده بوجه آتی بر آزا طرفلی معلومات ویرمک ایستیورز :

(مابعدی نسخه تالیه ده)

ابوالضیا زاده
ع . ولید

